



Vul persuader la regenza grischuna da laschar pajar il chantun tut ils custs da manaschi dal numer d'urgenza sanitar: la deputada Christina Bucher.

FOTO O. ITEM

# La participaziun duai restar

## La regenza vul mantegnair las contribuziuns dals pazients al numer d'urgenza

■ (anr/ac) Cun la dumonda n'ha la deputada Christina Bucher (ps, Cuira) betg gi success. Cun l'incumbensa inoltrada cun la medema finamira pretenda la deputada da la regenza il medem. Numnadamain dad egualisar las reglas da finanziar ils numeros d'urgenza. La regenza na vul dentant betg e propona al cussegl grond da renviar l'incarica, sco ella scriva en la risposta. Bain van tut ils cloms sur ils trais numeros d'urgenza 117, 118 e 144 dal chantun Grischun en la medema centrala responsabla da coordinar las acziuns da polizia, pumpiers e sanitar. Als custs da manaschi dal clom d'urgenza da la sanitar 144 ston ils pazients transportads cun ina ambulanza en in spital sa participar. E quai duai restar uschia, sco la regenza

scriva en ina resposta sin ina incumbensa inoltrada da la deputada Christina Bucher (ps, Cuira). Ella e ses consegnaders fan attent al manaschi communabel dals trais numeros d'urgenza ed èn da l'avis ch'il chantun duaja finanziar tuts trais servetschs.

La deputada vesa schizunt la pussaivladad da simplifitgar uschia las stentas administrativas. La regenza grischuna na vesa quai betg uschia. Ella vul mantegnair la participaziun finanziaria dals pazients als custs da manaschi dal numer d'urgenza 144. La regenza fa attent ch'ils custs da manaschi dal numer d'urgenza sajan part dals custs da l'entir servetsch da salvament. Las pauschalas incassadas per la disposiziun dal salvament cumporian per l'onn 2017 la summa da 511 000

francs. La situaziun finanziaria dal chantun sco las prescripziuns pretendessian da cumpensar quella summa insanua auter sch'ella crodia.

Primarmain fissian ils servetschs da spendrament dals spitals pertutgads da main contribuziuns e quai pudessia esser in problem existenzial per il servetsch dals spitals pitschens. La regenza è cunter la finamira da stritgar la participaziun finanziaria da las persunas transportadas dal servetsch da salvament respectiv als custs da manaschi dal numer d'urgenza 144.

Per ella è l'autezza da la participaziun legitima en il senn da la segirezza giuridica ed en paregl cun ils ulteriurs chantuns e perquai propona la regenza al cussegl grond da renviar l'incumbensa.